

Bláðamannafélag Íslands fagnar fyrirætlunum stjórnvalda um að styðja við bakið á einkareknum fjölmiðlum og þakkar menntamálaráðherra fyrir frumkvæði sitt í þeim efnum og fyrir að hafa sett málið á dagskrá. Þetta er mikilvægt skref og nauðsynlegt við þær aðstæður sem ríkja varðandi upplýsingagjöf í samfélagi nútímans og þau skilyrði sem eru fyrir hendi á fjölmiðlamarkaði.

Félagið hefur um árabíl lýst þeirri meginskoðun sinni, bæði í samtölum við þingnefndir og í umsögnum um þingmál, að nauðsyn bæri til að stjórnvöld styðji við bakið á fjölmiðlum til þess að tryggja fjölbreytni og fjölræði á íslenskum fjölmiðlamarkaði. Öflugir og fjölbreyttir fjölmiðlar eru forsenda lýðræðislegrar samfélagsskipunar og frjórrar og ábyrgrar umræðu í samfélaginu. Skilyrði til að stunda ábyrga fjölmiðlun hafa stórlega versnað á undanföllum árum og áratugum með vaxandi markaðsvæðingu, tæknibyltingum og alþjóðlegri samkeppni með tilheyrandi upplýsingamengun.

Bláðamannafélagið lítur á þessi frumvarpsdrög sem fyrsta skrefið í því að ríkisvaldið geri sitt til að skapa almenn og sanngjörn rekstrarskilyrði fyrir einkarekna fjölmiðla, skilyrði sem taki mið af því sem þekkist á hinum Norðurlöndunum. Auðvitað eru skiptar skoðanir um það hvernig best er að aðstoða fjölmiðla og tryggja lýðræðislega umræðu og hlutlæga upplýsingagjöf. Aðalatriðið í þeim efnum er að þeir fjármunir, sem varið er til þessa verkefnis nýtist sem mest og best fyrir vandaða fjölmiðlaumfjöllun með beinum hætti. Þannig verður lýðræðinu best þjónað. Félagið saknar þess að sjá ekki í frumvarpinu fyrirætlunir um beinan stuðning við rannsóknarblaðamennsku, til að mynda með svipuðum hætti og stutt er við bakið á listum í landinu með launasjóðum listamanna. Það er ódýr og beinskeytt leið til þess að tryggja lýðræðislegt aðhald í landinu. Einnig ber að gjalda varhug við fyrirætlunum um að ríkisvæða einkarekna fjölmiðla í of ríkum mæli. Eftir því sem úthlutunaraðferðin er hlutlausari er hún betri almennt talað og jafnræðið meira. Allt eru þetta álitæfni sem félagið mun fjalla um með ítarlegri hætti þegar frumvarpið kemur fram á Alþingi og verður til umfjöllunar í nefndum þess.

Virðingarfyllst

Hjálmar Jónsson, formaður BÍ